

## XXII.

MULGEDIUM SONCHIFOLIUM *Vis.* et *Panč.*

## Tabula II.

M. caule erecto striato villosulo, foliis supra glabratis, petiolo nervisque hirtellis, runcinato-pinnatifidis, inferioribus petiolatis, caulinis cordato-auriculatis amplexicaulibus, laciniis sinuato-dentatis ovatis acutis decurrentibus, cum terminali cordato-triangulari maxima saepe confluentibus; floribus glabris secus caulem fasciculatim sparsis, apice subumbellatis; pedunculis subsimplicibus squamulosis, capitulis involucreatis, achaeniis lanceolatis compressis obtusis 10-striatis, in rostrum concolor breve apice in cupulam eroso-denticulalam expansum attenuatis, pappo simplici scabro niveo.

SYN. *Lactuca sonchifolia* *Panč* Verz. d. in Serb. wildw. Phanerog. p. 85-non W.

ICON. Tab. II; *a*, Flosculus; *b*, Achaenium; *c*, id. auctum; *d*, Fragmentum pappi.

HAB. in sylvis abiignis, locis saxosis montis *Klanj* circ. Crnarekensis Serbiae australis, m. *Ozren* circ. Alexinacensis, m. *Plės*, *Rasovaz* et *Kamen* circ. Knsaževacensis, sub cacumine m. *Starica* prope *Majdanpek* circ. Krajenensis, m. *Kukutnica* et *Zlatibor* circ. Uzicensis, et m. *Beljanica* Serbiae centralis. Fl. Jul. Aug. Fl. aurei.

OBS. Clarissimus et deploratus Cichoracearum monographus *C. H. Schultz Bipontinus* supra plantam hanc a prof. *Pančič* acceptam, et quam antea *Mulgedium aureum* vocaverat, in litt. eidem datis novum genus condiderat, quod aliis quoque *Mulgedii* et *Lactucae* speciebus ditatum in scheda manuscripta et adhuc inedita sequenti modo illustraverat.

LACTUCOPSIS *C. H. Schultz Bipont.*

Nov. Cichoriacearum gen.

Capitulum pauci-multiflorum. Involucrum imbricatum, foliolis internis 5-13. Achaenia ovato-oblonga, compressa, utrinque pluristriata, in rostrum breve

robustum concolor abeuntibus, apice in areolam expansa, cui pappus insidet niveus caducus *L. mulgedioidis* et *Plumierii*, uti plurimum Lactucearum, corona ciliata persistente cinctus. — Folia dentata vel lyrata, superiora more *Lactucæ grandiauriculatae*. Flores flavi vel coerulei.

*Mycelis* Cass. differt involucro cylindraco 3-5-phyllo, basi minute calyculato, 3-5-floro, achaeniis minutis in rostrum pl. discolor abeuntibus.

*Lactucæ* achaenia sunt rostro gracillimo pl. elongato, piliformi terminata, cui pappus insidet pl. persistens.

Sect. I. *Prenanthopsis*. Involucri 5-flori foliola interna n.º 5. Achaenia crassa, cylindraco-compressa, striata, breve rostrata, brunnea. Huc

1. *Lactucopsis* (*Lactuca* Fenzl!) *brevirostris* Sz. bip. In monte Tauro, aestate 1836: Kotschy n. 335.

Huic affinis *Lactucopsis*? (*Lactuca* DC., pr. VII, p. 139, n.º 43) *deltoidæ* Sz. Bip. sed diversa capitulo 8-10-floro et achaeniis magis compressis, in rostrum gracilius pallidius abeuntibus, hinc *Mycelidi* accedens quocum achaenium jam comparavit b. DC.

SECT. II. *Eulactucopsis*. Involucri foliola interna n.º 8-13, capitula 11-18-flora.

a) folia infima lyrata, caulina integra, denticulata, sagittata, achaenia rufo-atra. Huc

2. *Lactucopsis* (*Lactuca* Vill. Dauph. III, p. 154, t. 32 dextr.) *Chaixi* Sz. Bip. Exsicc. Billot! n.º 1255 (pr. Gap. Delphin Blanc!) — Syn. *L. Chaixi* est *Lactuca* sagittata W. K. pl. rar. Hung. p. I, t. 4, sec. specimina in Hungaria pr. Budam: Lang! et Fünfkirchen: Balek!, in Banatu prope thermas Herculis a C. Wierzbicki! et Heuffel! et in Serbia a cl. Pančić!

3. *Lactucopsis* (*Lactuca* M. B. — Ledeb! fl. ross. II, p. 805) *altissima* Sz. Bip. a *L. Chaixi* inter alia differt: foliis caulinis mediis et superioribus lanceolatis, acuminatis, acutissime dentatis (Vidi specim. caucasica a cl. Hohenacker! et e mont ponticis a cl. C. Koch! nom. *L. sagittatae*).

b) folia lyrato-pinnatifida.

α. glaberrima.

\* Achaenia rufo-atra.

4. *Lactucopsis* (*Lactuca* F. M. — DC. pr. VII, p. 134.) *Wilhelmsiana* Sz. Bip. sec. capitulum herb. DC. huc spectat, et praeter flores coeruleos, foliorum lobis linearibus a sequente differt.